

YESU ANATUHIMIZA TUTAFAKARI MATESO YAKE

(Yesu alivyofafanua kwa Mtumishi wa Mungu Luisa Piccarreta)

1. Yesu Anamfurahia Yule Anayetafakari Daima Mateso Yake

Tarehe 9 Novemba 1906, katika Kijitabu Na. 7, Luisa aliandika:



Wakati nikiwa katika hali yangu ya siku zote, nilikuwa nikiwaza juu ya Teso la Bwana Wetu. Nikiwa nawaza hilo, Yesu alikuja na akaniambia:

“Binti yangu, **Mimi hunifurahisha sana mtu yule anayecheua na kutafakari daima Teso Langu, anayesikitishwa nalo na anayenionea Mimi huruma. Hilo linaniletea raha na nafuu kutoka Mateso yote niliyoyapata katika Teso langu.** Pindi mtu anapotafakari daima ndipo huwa anaandaa lishe endelevu ambayo ndani yake kuna viungo mbalimbali vyenye ladha tofauti tofauti ambazo huleta matokeo kadha wa kadha. Katika Mateso yangu walinitolea kamba na minyororo kwa ajili ya kunifunga Mimi lakini mtu huyu anayetafakari Saa za Mateso huwa ananifungua na kuniacha nikiwa huru. Wale maadui walikuwa wananidharau, walinitemea mate na walinidhalilisha, lakini kumbe mtu huyu ananithamini, ananisafisha akiyaondoa yale mate waliyonitemea na ananiheshimu. Wale walinivua nguo zangu na walinipiga mijeledi lakini mtu huyu ananiweka sawa tena na ananivalisha. Wale walinivalisha taji la miiba na wakanidhihaki kama mfalme-kichokoo. Mdomo wangu waliuunguza kwa nyongo na walinisulibisha. Mtu huyu lakini, anapotafakari maumivu yangu yote, huwa ananivalisha taji la utukufu. Mtu huyu ananipa heshima kama mfalme wake, anaujaza mdomo wangu kwa utamu, ananipatia chakula kile kizuri kabisa kabisa, yaani ananipatia kumbukizi za matendo yangu yale yale na ndipo ananiondolea misumari ile ya Msalabani na ananifanya nifufuke ndani ya moyo wake. **Mimi, kama malipo, ninampatia uhai mpya wa neema; kwa hiyo mtu huyo ni chakula changu na mimi najifanya kuwa chakula chake endelevu. Na kile kinachonipendeza zaidi ni mtu yule anayetafakari daima teso langu**”.

2. Roho Anayekariri Mateso ya Yesu, Mwenyewe Atajazwa Nafsi ya Yesu

Tarehe 24 Machi 1913, katika Kijitabu Na. 11, Luisa anaandika:

Nilikuwa najionja namna fulani ya kutoridhika kwa kumkosa Yesu Wangu Mpendwa. Na ndipo, baada ya kupita muda mfupi Yesu akaniambia: “Binti yangu, upo ukifanya nini? **Mimi ndiye ‘ridhika’ ya wanaoridhika.** Wakati nipo tayari ndani yako na huku nikisikia manung’uniko yako kadhaa, nagundua kuwa ni wewe. Kwa kweli ninajitambua kwamba hapo ndani yako sipo Mimi peke yangu kwani **hayo manung’uniko ni sehemu ya tabia ya kimaumbile ya kibinadamu na wala siyo ile tabia ya kimungu.** Utashi Wangu, lakini, ni kuwa ile tabia ya

kibinadamu ifutike kabisa ndani yako na badala yake uwepo tu ule Uhai wangu wa kimungu”.

Napenda kuongeza kwamba nilipoendelea kuwaza ndani yangu juu ya Mama mtamu, Yesu aliniambia:

“Binti yangu, kwa upande wa Mama yangu mpenzi, haijatokea kamwe kutoweka ndani yake yale mawazo juu ya Mateso yangu. Yeye, ili aweze kuyarudia tena Mateso yangu, alipata kujazwa nafsi yangu ndani ya nafsi yake. Na ndiyo hivyo inatokea kwa roho. Ili huyo roho aweze kurudia kile nilichoteswa mimi, naye huyo hujazwa nafsi yangu.

3. Kutafakari Saa za Mateso Siyo Shughuli Yenu tu, Bali ni Shughuli ya Mimi Yesu

Tarehe 10 Aprili 1913, katika Kijitabu Na. 11, Luisa aliandika:

Leo hii asubuhi, Yesu Wangu Mpendwa amekuja na aliponikumbatia moyoni ameniambia:

“Binti yangu, mtu yule anayewaza daima juu ya Mateso yangu hutengeneza moyoni mwake chemchemi. Na jinsi anavyoendelea kuwaza zaidi juu ya Mateso yangu, ndivyo, chemchemi hiyo huzidi kukua na kuongezeka. Na kwa vile maji yanayobubujika kutoka hapo ni maji kwa ajili ya watu wote, hivyo ndivyo chemchemi hii ya Mateso yangu inayotengenezwa ndani ya moyo wa mtu, huleta manufaa kwa mtu mwenyewe, huleta Utukufu kwangu, na huleta manufaa kwa viumbe”.

Na mimi nikasema: “Ewe Chema Changu! Ebu uniambie, ni kitu gani utawalipa wale ambao watatafakari Saa za Mateso kama ulivyonifundisha mimi?”

Na Yeye: **“Binti yangu, Tafakari ya Saa hizo za Mateso Mimi sitahesabia kama shughuli yenu binafsi bali kama shughuli inayotekelezwa na Mimi mwenyewe. Na kwa hiyo nitawapatieni mastahili yale yale niliyopata mimi kama vile ilivyokuwa katika hali halisi ya kupata Mateso yangu, na kwa hiyo nitafanya ninyi myapate pia matokeo yale yale kutegemea na hali ya roho ya kila mmoja wenu. Nitafanya hivyo hapa duniani; na baadaye kule mbinguni nitakuwa na hoja gani hata nisiweze kuwapatieni mastahili makubwa zaidi? Roho hizo nitaziweka mbele kukabilina nami, nitakuwa nikiwalenga na kuwapiga kwa mishale ya Pendo na ya raha katika kila nafasi wanapotekeleza hizi Saa za Mateso yangu. Na wao wenyewe watakuwa wakinipiga Mimi kwa mishale hiyo hiyo. Itakuwa ni raha gani hii na utamu gani huu kwa hao watu wenye heri!**

Kishapo (Yesu) aliongeza kusema:

“Pendo langu Mimi ni moto, lakini siyo kama moto huu wa siku zote wa kuni ambao unaunguza vitu hata kuviteketeza viwe majivu. Moto wangu Mimi unahuisha, unakamilisha na kuhitimisha. Na endapo moto huo unaunguza na kuteketeza kila kitu kisicho kitakatifu, yaani unateketeza matamania, upenzi, mawazo yasiyo mema, basi hiyo yote ni nguvu ya moto wangu, yaani, unaunguza uovu na ubaya na huuleta uhai wa wema.

Na kwa hiyo, iwapo roho hana hisia yoyote ya maelekeo mabaya ndani yake basi awe na uhakika kwamba moto wangu u ndani yake. Lakini, endapo anahisi kuwa na moto ndani yake uliochanganyika na ubaya basi kuna mashaka hapo iwapo moto huo kweli watoka kwangu.

4. Chimbuko la Saa za Mateso ya Yesu Ni Katika Kilindi cha Moyo Wake. Kwa Mtu Yule Atakayezitafakari Yesu Atammwagia Pendo Lote Badala ya kumpatia Rehema tu

Tarehe 6 Septemba 1913, katika Kijitabu Na 11, Luisa aliandika:

Nilikuwa nikiwaza na kuwazua juu ya Saa za Mateso: Mbona kuna sala nyingi sana ambazo zimewekewa rehema nyingi kabisa, kwa nini basi Saa za Mateso hazikupewa rehema ? Na yule anayezitafakari mbona hafaaidiki na lolote? Pindi nikiwaza hivyo, Yesu Mpendwa Wangu wa daima aliye ni ukarimu kamili ameniambia:

“Binti yangu, ni kweli kwa njia ya sala zilizopangiwa rehema mtu huambulia kitu fulani. **Lakini Saa za Mateso Yangu, kwa vile zenyewe tayari ni sala zangu, zenyewe ni fidia zangu, zenyewe ni Pendo lote, hizo hutoka hasa hasa katika kilindi cha Moyo Wangu. Je labda umesahau ni mara ngapi Mimi nimewahi kuungana nawe ili tuzitekeleze kwa pamoja na hivyo nikaweza kugeuza mikasa, balaa na maangamizi kuwa neema juu ya dunia yote? Kwa hiyo basi, ndivyo ilivyo namna ya furaha yangu na jinsi ya ukuu wa hiyo furaha. Yaani, badala ya kuwapatieni rehema, Mimi nawamwagieni upendo ambao ndani yake zipo rehema nyingi zisizohesabika, zenye thamani isiyo na mipaka. Halafu fahamu kwamba pale ambapo mambo hufanywa kwa upendo safi, hapo Pendo langu hupata mwanya wa kufumuka kwa nguvu hata haliwezi tena kusita kukisaidia na kukiwezesha kiumbe kutoa raha na kumwaga kitulizo juu ya Pendo la Muumba”.**

5. Miiba Iliyochovyelewa na Kuloweshwa Na Damu ya Yesu Itamponya Binadamu Na Itamrejeshea Lile Taji Ambalo Dhambi Ilimwondolea

Tarehe 10 Aprili 1914, katika Kijitabu Na 11, Luisa aliandika:

Asubuhi ya leo, Yesu Wangu Mpendevu alinijia akiwa katika hali ya Msulibiwa, akawa ananishirikisha maumivu yake. Alinivutia kwake kabisa mpaka ndani ya bahari ya Mateso yake ambayo nikawa ninayafuatilia hatua kwa hatua. Kwani kuna mtu gani anayeweza kuelezea yote niliyokuwa nayaona? Yalikuwa ni mambo mengi mno hata sielewi nianzie wapi. Niseme tu kwamba katika kumwangelia akirarua taji la miiba toka kichwani mwake, kwa vile miiba ilishikamana na Damu hata haikutaka kutoka, Damu imekuwa ikitoka katika matobo yale madogo madogo na ikawa inatoka na kuchirizika kama mito juu ya Uso wake, juu ya nywele zake na kishapo ikawa inatiririka juu ya Mwili wake wote! Na Yesu akasema:

“Binti yangu, **miiba hii inayochoma na kutoboa Kichwa changu, hii itatoboa majivuno, kiburi cha viumbe, itatoboa pia majeraha yale yaliyofichikana sana hata kufanya usaa uliopo ndani utoke nje. Na ile miiba iliyochovyelewa katika Damu yangu itaviponya viumbe hivyo na itavirejeshea lile taji lao lililokuwa limeondolewa na dhambi”.**

Kishapo Yesu alinipitisha kuona sehemu nyingine za Mateso Yake lakini mimi nikawa naonja moyo wangu ukiumia mno ninapomwona akiteseka mno vile. Na Yeye halafu aliendelea kuelezea juu ya Utashi wake Mtukufu akisema:

“Binti yangu, **makao yangu hapa duniani ni katika yule roho anayetimiza Utashi Wangu.....”.**

6. Kwa Kila Mtu Anayetafakari Saa za Mateso Pamoja na Yesu na Kwa Utashi Ule Ule Wake Yesu, Yeye Atakuwa Anamlipa Roho Mmoja na Busu Moja

Mwezi Oktoba 1914, katika Kijitabu Na 11, Luisa aliandika:

Nilikuwa katika kuandika Saa za Mateso, huku nikiwa ninawaza na kuwazua: Ni sadaka ngapi zatakiwa kwa ajili ya kazi hii ya kuziandika hizi Saa za Mateso anazosisema? Na hasa hasa, namna ya kuandika juu ya karatasi, matendo kadhaa ya ndani ambayo yametukia kati ya Yesu na mimi peke yetu? Kwani Yeye atanilipa nini mimi? Hapo Yesu akiniwezesha mimi kusikia kabisa sauti yake laini na tamu ameniambia:

“Binti yangu, **ili kukulipa kwa kazi ya kuandika Saa za Mateso yangu, Mimi nitakupatia roho moja na busu moja kwa kila neno uliloandika”.**

Na mimi nikasema: “Ee Pendo langu, neno hilo utalifanya kwa mimi, **na je utawapatia nini wale watu wengine ambao watatafakari Saa za Mateso?”**

Na Yesu akasema: **Iwapo watatekeleza Saa za Mateso pamoja nami na kwa nguvu ya Utashi Wangu wenyewe, Mimi, kwa kila neno watakalotamka nitakuwa nawapatia pia roho kwa vile ukubwa au udogo wa nguvu na uwezo wa Tafakari ya Saa hizi za Mateso ni katika ukubwa au udogo wa muungano unaokuwepo kati ya Mimi na watu hao wanaotafakari. Na kiumbe anapozitekeleza hizo Saa kwa nguvu ya Utashi Wangu, kiumbe huyo huwa anafichama ndani ya Utashi Wangu, na wakati huo huo Mimi nikitekeleza Utashi Wangu huwa nina uwezo wa kutenda mema yote ninayoyataka, yakiwepo mema kwa ajili ya kila neno hata likiwa ni moja tu. Na hilo nitatenda kila mara ninyi mtakapotekeleza Saa za Mateso”.**

Kwa mara nyingine tena, nikawa nipo katika kumnung'unikia Yesu, kwamba baada ya sadaka kubwa nilizotoa katika kazi ya kuandika hizi Saa za Mateso, palijitokeza roho wachache sana waliohiari na walioweza kuzitekeleza wenyewe. Na Yeye akasema:

“Binti yangu, usilalamike. **Hata kama bado kukiwa na roho hata mmoja tu, wewe budi uridhike naye. Je mimi nisingepasika kupitia Mateso yangu yale yote hata kama ingekuwa**

kwa ajili ya kumwokoia roho moja tu? Ndivyo jinsi roho walivyo na gharama. Mabaya yote yatamkabili yule asiye faidi tafakari ya Saa za Mateso.

Mateso yangu yalinipelekea Mimi kujipatia stahili juu ya Ubinadamu Wangu ili kuwawezesha binadamu wote kuokolewa. Kumbe lakini katika hali halisi siyo wote wanafanikiwa kuokoka. Hii ni kwa vile Utashi Wangu ulikuwa ni ule wa kuokoa watu wote; na pia, kwa vile nilistahili kupewa kila kitu kadiri nilivyotaka na kutarajia Mimi, na wala siyo kadiri ya kiasi cha faida ambayo wangepata viumbe. Ndivyo basi na wewe binti, kwa jinsi vile utashi wako umejiainisha na utashi wangu na kuwa kitu kimoja katika kutaka kutenda mema kwa watu wote, ndivyo nawe utalipwa mastahili.

Lakini tafakari ya hizi Saa za Mateso ni tafakari yenye thamani kabisa kupita tafakari nyingine, kwani tafakari hii siyo kitu kingine, isipokuwa ni kurudia kutafakari kile nilichokuwa nimetenda Mimi wakati wote wa Maisha yangu ya hapa duniani, na ndicho kile kinachoendelea kutendeka sasa katika Sakramenti Tukufu ya Ekaristi. Pale ninaposikia Tafakari ya Saa za Mateso yangu, huwa ninasikia sauti yangu mwenyewe, nasikia sala zangu mwenyewe na ninauona Utashi Wangu wenyewe ndani ya yule roho anayetafakari. Yaani, nauona Utashi Wangu wa kutaka kutenda mema juu ya watu wote, na kutaka kulipa fidia ya wote. Hapo najionja kuchukuliwa na kuingia kusetiri ndani ya roho huyo anayetafakari ili hapo niwe nami natenda kile ambacho yeye anakifanya. Oh! Ni jinsi gani ninavyotamani pakawa katika kila nchi na angalau roho mmoja anayetekeleza hizi Fikara za Saa za Mateso yangu! Ningekuwa najisikia sana katika kila nchi, na hukumu yangu ya Haki ambayo siku hizi imehuzunishwa sana, ingepata kutulizwa kwa kiasi fulani.

Hapa napenda kuongeza kwamba, siku moja nilikuwa katika fikara ya Saa ile ya Mama wa mbinguni alipomzika Yesu. Hapo nilimfuata nyuma ili nimsindikize katika uchungu mkali wa kuachika katika upweke na ili kumliwaza na kumhurumia. Sikuwa nimezoea kufanya hilo kila siku bali mara kadhaa tu. Ikafikia mahali sikujua niamue lipi kati ya kufanya au kutokufanya. Na Yesu Mbarikiwa, Pendo kamili akiwa kana kwamba ananisihi sana aliniambia:

“Binti yangu, Sitaki wewe uliache zoezi hili, bali utalitekeleza kwa ajili ya upendo wako kwangu na kwa heshima ya Mama yangu. Unajua kuwa kila mara unapotekeleza zoezi hili, Mama yangu anajisikia kama vile angekuwa yupo yeye mwenyewe hapa duniani na katika nafsi yake mwenyewe, akiwa anayarudia maisha yake ya awali. Kwa hiyo basi, yeye anapokea ule utukufu na upendo aliokuwa anautoa kwangu hapa duniani, na hapo na Mimi najisikia kabisa kuwa Mama yupo tena duniani pamoja nami, naonja upenzi wake wa kimama, upendo wake, na ule utukufu wote aliokuwa ananipa, yaani nitakuona wewe ni sawa kabisa na Mama”.

Na baada ya hapo, huku akiwa ananikumbatia, nikajisikia moyoni mwangu nikisema kimya kimya: “Mama yangu, Mama yangu”. Ndipo Mama mtamu akawa ananidokezea kile alichokuwa akitenda na kuteseka katika Saa ile ya Mateso. Nami basi nilimfuata na tangu hapo sikusahau na wala sikuacha kutafakari Saa za Mateso huku nikisaidiwa na neema yake Yesu.

7. Baada ya Kufa Kwao, Yesu Atawalipa Luisa na Watu Wote kwa Kila Nafasi Walipotafakari Saa za Mateso

Tarehe 4 Novemba 1914, katika Kijitabu Na. 11, Luisa aliandika:

Nilikuwa nikitafakari saa za Mateso ndipo Yesu, akifurahia kabisa, aliniambia: “Binti yangu, **Ungejua raha kubwa ninayopata na ninavyofurahi kila ninapokuona ukitafakari Saa za Mateso, na ninapokuona unafanya hivyo kwa kurudia rudia na kurudia tena na tena. Hakika na wewe ungefurahi sana sana.** Ni kweli kwamba, Watakatifu wangu walikuwa wanatafakari Mateso yangu na walielewa ni Mateso gani niliyoyapata. Walitokwa na machozi ya uchungu na huruma, hata wakajitesa na kujihinisha wenyewe kwa pendo la maumivu yangu. Hata hivyo fikara yao haikuwa ni zoezi endelevu na la kurudiarudia na kwa mpangilio kama huu.

Kwa hoja hiyo naweza nikasema kuwa wewe ndiye mtu wa kwanza kunipatia kionjo na ladha nzuri na kubwa ya namna hii na ya pekee. Wewe unatafakari ndani yako saa hadi saa juu ya maisha yangu na juu ya Mateso yale niliyopata. Na kwa upande wangu, najisikia ninavutwa kabisa saa kwa saa, kukuandalia chakula ili niweze kula pamoja nawe. Pia ninavutwa kutenda kile kile unachotenda wewe. Lakini ujue kuwa Mimi nitakulipa kwa uwingi kabisa kwa nuru mpya na kwa neema mpya. Hata baada ya kufa kwako Mimi, toka mbinguni, nitakuwa nakufunika daima kwa nuru mpya na utukufu katika mara zote ambapo tafakari za Saa za Mateso zitakapokuwa zinatekelezwa na watu mbalimbali hapa duniani.

8. Kulipa Fidia kwa Wote. Yule Anayetafakari Saa za Mateso Hubadilisha Mabaya Aliyotendewa Yesu ili Yawe Ni mema

Tarehe 6 Novemba 1914, katika Kijitabu Na. 11, Luisa aliandika:

Nikiwa naendelea na tafakari ya kawaida ya Saa za Mateso, Yesu Wangu Mpendevu ameniambia:

“Binti yangu, **dunia ipo ikiendelea bado kunisababishia Mimi Mateso mapya. Kwa vile Ukuu wangu unachukua na unashikilia viumbe vyote ndani na nje yangu, Mimi siwezi kuepa kugusana navyo. Na kwa hiyo ninalazimika kukabiliwa na misumari, miiba, mijeledi, madharau, kutemewa mate na kutendewa yale yote niliyoyapata katika Mateso na hata zaidi ya hayo. Lakini muda huo, kutokana na tendo la kugusana na mtu anayetafakari Saa za Mateso yangu, Mimi najisikia kung’olewa misumari, kuchomolewa miiba, kunogeshewa majeraha na hata kupanguswa mate waliyonitemea. Najisikia pia kubadilisha kuwa mema yale maovu wanayonitendea watu wengine. Na ninapoendelea kuonja kuwa ugusano wangu na hao watu wema hauniletei madhara yoyote bali huniletea raha, Mimi nazidi kuegemea zaidi na zaidi kwao**”. Zaidi ya hilo, Yesu Mbarikiwa alirudia kuzungumzia hizi Saa za Mateso akisema:

“Binti yangu, ufahamu kwamba katika kutekeleza tafakari ya hizi Saa za Mateso, mtu hutwaa mawazo yangu na kuyafanya yawe ya kwake; hutwaa pia fidia zangu, sala zangu, matarajio yangu, upenzi wangu, na hata nyuzi zangu za vionjo zilizopo katika kina cha mwilini mwangu na anazifanya nyuzi hizo zote ziwe za kwake. Na mtu huyo huyo anapojiinua na kujiweka kati ya mbingu na dunia, anatekeleza kazi yangu Mimi mwenyewe na hapo akiwa kama ‘mwokozi mshiriki’ hutoa kauli pamoja nami kwa kusema:

‘Tazama mimi nimekuja, nitume mimi – *Ecce ego, mitte me* – Ninataka kukulipa malipizi kwa ajili ya wote, nataka nijibu kwa ajili ya wote, na nataka kuleta maombi kwa ajili ya mema na manufaa ya wote”.

9. Iwapo Utaruhusu Utashi Wangu na Pendo Langu vitiririke Kama Uhai Ndani Yako, Basi na Mateso Yangu Yatatiririka Ndani Yako

Tarehe 20 Novemba 1914, katika Kijitabu Na. 11, Luisa aliandika:

Nilikuwa nikijisikia nateseka sana kwa ajili ya Yesu Mbarikiwa aliyekuwa katika hali ya kukosa mahitaji yake na zaidi hasa kwa ajili ya mikasa mingi iliyokuwa inatua kama mvua juu ya dunia. Yesu alikwisha kunieleza mara nyingi katika miaka kadhaa ya nyuma.

Yaeleweka ilikuwa ni jambo sahihi kuwa, kwa miaka mingi sana, alinifunga kitandani ili tushirikiane pamoja magumu na mabaya ya dunia. **Tuliteseka pamoja na tulifanya kazi pamoja kwa manufaa ya viumbe vyote. Yaelekea pia kuwa hali yangu ya kuwa mhanga ambamo Yesu Mpendevu aliniingiza, ilikuwa inafungilia viumbe vyote katikati ya mimi na Yeye. Hapakuwa kamwe na kitu alichotenda ambacho hakunijulisha kabla na wala hapakuwa na adhabu ya pigo au mkasa aliotarajia kushusha ambao hakunitaarifu kwanza. Na kwa hiyo basi, mimi nikiwa mbele yake nilifanya juu chini au apunguze hadi nusu au nilimzuia kabisa asiitoe hiyo adhabu.**

Basi sasa narejea kusema kwamba kwa vile nilikuwa nateseka sana, Yesu, wakati akija kunituliza, alinichukua mikononi na kunikumbatia huku akisema:

“Binti yangu, mtu yule anayetimiza Utashi Wangu, kamwe hataachwa bila kusindikizwa na Mimi. Bali atakuwa pamoja nami katika kazi ninayoitekeleza na katika tamaa niliyo nayo juu ya viumbe wote. Pale mtu huyo anapoonekana kushindwa kuvipata hivyo viumbe, Mimi ninakuwa tayari nimejizatiti na kuvizunguka ili kuvishinda na kuvipata. Kishapo, ninapoona matakwa yangu yanatimia ndani ya mtu huyo anayetekeleza Utashi Wangu, hamu yangu hutua na kupumzika hapo ndani ya mtu huyo, na pendo langu pia hupumzika hapo katika pendo lake. Na hivyo hutokea kwa mengine yote yaliyobakia”. Halafu aliendelea kusema:

“Nimekupatia mambo mawili makubwa kabisa ambayo twaweza kusema ndiyo yanaunda Uhai Wangu wenyewe: Utashi wa kimungu na Pendo. Yaani huo Utashi na hilo Pendo ndivyo viliendesha ndani yangu Uhai Wangu na ndivyo vilivyotekeleza na Mateso Yangu.

Toka kwako sitaki kitu kingine isipokuwa nataka Utashi Wangu uwe ni uhai wako na uwe ni kanuni yako ya maisha. Wewe usiutoroke wala kuukwepa Utashi Wangu katika jambo lolote, liwe dogo au liwe ni kubwa. Utashi huo na Pendo hilo vitaendesha na kutenda Mateso Yangu ndani yako. Kadiri utakavyobaki umefungamana na Utashi Wangu ndivyo utakavyonipenda zaidi na ndivyo utauonja zaidi ndani yako.

Endapo utafanya Utashi Wangu na Pendo langu vitiririke ndani yako kama uhai, Mateso yangu yatatiririka ndani yako. Kwa vile utakuwa unajisikia Utashi Wangu ukitiririka katika kila wazo lako, mdomoni mwako utajihisi ulimi umelowana, na neno lako litatoka likiwa na joto joto la Damu Yangu na hivyo utakuwa ukizungumzia kwa uwezo na ufasaha juu ya maumivu yangu. Moyo wako utakuwa umejaa maumivu yangu na kwa hiyo kila utakapokuwa unajifungua popote katika nafsi yako utakuwa unaleta mhuri wa ujumbe wa Mateso Yangu. Na Mimi nitakuwa naendelea kurudia rudia nikisema: ‘Tazama Uhai Wangu, Tazama Uhai Wangu.....’ na nitakuwa nafurahia kukuletea ushitukizi kwa kukusimulia mara Teso hili moja na mara Teso lingine tofauti, yote yakiwa ni mapya ambayo hujawahi kusikia wala kuyafahamu. Je bado hujaridhika na hilo?

10. Mateso ya Yesu Huendelea Bado Kutokea. Toka Mbinguni Hukumu ya Haki Inamshitua Yesu na kutoka Duniani Viumbe Vinamshitua kwa Dhambi. Usichoke Kubaki Kando yangu Ukirudia na Kupitia Mapigo Yangu

Tarehe 14 Agosto 1915, katika Kijitabu Na. 11, Luisa aliandika:

Nikiwa naendelea na hali yangu ya siku zote. Yesu amefika bila mimi kutegemea. Alikuwa amechoka kweli, amedhoofika sana hivi hata akaniita **Yeye Mwenyewe nibusu majeraha yake na nimpanguse Damu iliyokuwa inatiririka kutoka kila kona ya Mwili Wake Mtukufu.** Halafu baada ya mimi kupitia sehemu zote za Mwili wake, nilitoa heshima zangu mbalimbali na pia fidia. Yesu Wangu Mtamu, baada ya kuwa ameburudika kidogo, aliniegemea mimi na akasema:

“Binti yangu, Mateso yangu, majeraha yangu, Damu yangu na kila kitu nilichotenda na kuteseka, vyote vipo kati ya watu vikiendelea kutenda kazi kana kwamba ningekuwa natekeleza na kuteseka sasa na dakika hii. Hivyo vyote vinatumika sasa kama mahali pa Mimi kuegama na pia kama mahali wanapoegama roho ili wasiweze kuanguka katika dhambi bali waweze kuokoka.

Hatimaye, katika nyakati hizi za Mateso, Mimi ni kama mtu anayeishi hewani ambaye hana ardhi chini anapoweza kutua, na kwa hiyo anabaki akiendelea kulalama: **Hukumu ya Haki**

inalalama kutoka juu mbinguni na kutoka chini duniani wanalalama viumbe wenye dhambi.

Tena basi, jinsi mtu anavyobaki akiwa kando yangu akiendelea kubusu majeraha yangu, akiendelea kulipa fidia kwa kutolea Damu Yangu, yaani kwa neno moja, akiendelea kutenda lile nililokuwa natenda Mimi wakati wa uhai wangu na wakati wa Mateso Yangu, ndivyo hasa anazijenga nguzo nyingine zitakazokuwa ni egemeo langu ili nisiweze kudondoka. Kwa njia hiyo anapanua uwigo ule ambapo roho watakuwa wanaweza kuegama, na hivyo wasiweze kuanguka katika dhambi bali waweze kuokoka. Basi, Binti yangu, usichoke kusimama kando yangu na kuendelea kurudia kuyapitia majeraha yangu. Mimi Mwenyewe nitaingiza na kusukumiza ndani yako mawazo, upenzi na maneno ili kukupatia uwanja wa kutosha wewe kukaa kando yangu. Wewe uwe mwaminifu kwangu kwani nyakati zinapita haraka sana. Hukumu ya Haki inataka kulipua hasira yake kwani viumbe vinazidi kuichokoza. Zile nguzo za kuegemea budi ziongezwe mara dufu zaidi, na kwa hiyo usikose kuwepo kwenye hiyo kazi.

11. Kila Umivu Alilopata Yesu Limezaa Nuru Katika Ubinadamu Wake

Tarehe 23 Aprili 1916, katika Kijitabu Na. 11, Luisa ameandika:

Wakati nikiendelea na hali yangu ya kawaida, Yesu Wangu Mwabudiwa alijitokeza akionekana akiwa amezungukwa na nuru iliyokuwa ikitoka ndani ya Mwili wake Mtukufu. Nuru hiyo ilileta uzuri wa ajabu na wenye kuvutia kwa nguvu ya sumaku. Wakati mimi nilibaki nikiduwaa kumbe Yeye aliniambia: “Binti yangu, **kila umivu nililopata, kila tone la Damu, kila jeraha, kila sala, neno, tendo, na kila hatua nk. Ilizaa nuru ndani ya Ubinadamu Wangu ambayo ilinipamba na kuniremba hata ikanipelekea kuvutia kwangu na kuwateka watu wote wenye heri. Sasa je roho huwa anafanya nini mbele ya kila wazo la Mateso Yangu, la uchungu wangu na la fidia zangu nk.... Roho huyo hawezi kufanya lingine isipokuwa kuchota nuru toka kwenye Ubinadamu Wangu, na kwa nuru hiyo, anajiremba na kujipamba akijifananisha na Mimi. Kwa hiyo basi, wazo moja tu la ziada juu ya Mateso Yangu litakuwa ni nuru ya ziada ambayo itaniletea furaha ya milele”.**

12. Saa Za Mateso Ni Matone Matamu Ambayo Roho Huwa Wanatoa Kwake Yesu

Tarehe 13 Oktoba 1916, katika Kijitabu Na. 11, Luisa aliandika:

Nilikuwa nikitafakari Saa za Mateso, ndipo Yesu Mbarikiwa aliniambia:

“Binti yangu, **katika kipindi chote cha Uhai Wangu wa hapa duniani, maelfu na maelfu ya Malaika walikuwa wanasindikiza na kuulinda Ubinadamu Wangu huku wakikusanya mambo yote niliyokuwa nayatenda, yaani, mambo yote kijumla kama vile hatua zangu, matendo yangu, maneno, pumzi, maumivu na matone ya Damu Yangu. Hao walikuwa ni**

Malaika waliotumwa na kuagizwa kunilinda na kunitolea heshima. Kwa utii walikuwa wakipanda na kushuka toka mbinguni kila nilipowaashiria ili kupeleka kwa Baba kile nilichokuwa nikitenda. Ni wazi, Malaika hao wana kazi maalumu. Pindi roho anapojikumbusha juu ya Maisha Yangu, juu ya Mateso Yangu na juu ya sala zangu, wao humzunguka huyo roho kwa ajili ya kukusanya maneno yake, sala zake, uchungu wake juu yangu, machozi yake na majitoleo yake. Wanayaunganisha hayo yote pamoja na yale ya kwangu na kwa pamoja wanayafikisha mbele ya Utukufu Mkuu Wangu ili kunirejeshea Utukufu wa Uhai Wangu Mwenyewe. Hapo Malaika wanapata furaha kubwa hivi hata wanasimama kwa heshima kubwa kusikiliza kile kisemwacho na huyo roho na wanasali pamoja naye. Kwa hoja hiyo basi, ni jinsi gani yapasa roho awe anatafakari Saa za Mateso kwa umakini sana na kwa heshima kubwa akizingatia kwamba Malaika nao wananing'inia midomoni mwake ili kurudia nyuma yake kila kitu anachokisema!”.

Kishapo ameongeza kusema:

“Juu ya maumivu na machungu wanayonitendea viumbe, hizi Saa za Mateso ni dosi ndogo zenye utamu wanazonipa roho. Lakini mbele ya dosi nyingi za uchungu nizipatazo, hizi tamu ni chache mno. Kwa hiyo....tafadhali eneza zaidi, eneza zaidi (hii tafakari ya Saa za Mateso)!”

13. Haiwezekani Yesu Asimpende Yule Anayempenda. Aonapo Kuwa Roho Ameazimia Kulipa Fidia Badala Ya Wadhambi, Yeye Anamwombea Radhi Huyo Roho

Tarehe 30 Novemba 1916, katika Kijitabu Na. 11, Luisa aliandika:

Nilipata uchungu sana kumwona Yesu Wangu Mwabudiwa akikosa mahitaji yake. Nikawa ninalia kwa masikitiko sana. Na kwa vile nilikuwa katika kutafakari Saa za Mateso, wazo hili likawa linanitesa sana na kuniambia: “Ona jinsi zinavyokufaa fidia ulizozitoa kwa ajili ya watu wengine hata ukapasika kumkimbia Yesu.....” pamoja na maazimio yako mengine.

Na Yesu Mbarikiwa, akiguswa na kuonyesha huruma ya machozi, alinibania kwenye Moyo Wake na akaniambia: “Binti yangu, wewe ni mwiba wangu unaonichoma. Pendo langu limebanwa kabisa na mashambulizi yako. Laiti ungejua jinsi gani ninavyoteseka ninapokuona unateseka kwa ajili Yangu Mimi! Lakini Hukumu ya Haki inapotaka kufumuka, mashambulizi yako hayo hayo yanamilazimisha Mimi nijifiche.

Dhoruba huzidi kuchafuka zaidi na kwa hiyo, ebu vumilia!!! Na tena ujue kwamba, fidia ulizozitoa kwa ajili ya watu wengine, zina manufaa sana kwako mwenyewe, kwani pale ulipowalipia fidia wengine, ulikuwa unanuia kutekeleza kile nilichokuwa nimefanya Mimi. Lakini kumbe kwa kweli nilikuwa ni Mimi niliyekuwa nalipa malipizi kwa ajili ya watu wote na pia kwa ajili ya wewe. Nilikuwa naomba msamaha kwa ajili ya wote, kama vile nilivyoomba msamaha kwa ajili yako na hata nilikuwa nateseka kwa ajili yako pia. Kwa sababu hiyo, nilipokuwa natekeleza hayo yote niliyotenda, Mimi nilikuja kutwaa kwa

pamoja yale yote niliyokuwa nayo kwa ajili yako, yaani fidia, msamaha na maumivu. Je ni kipi kingekufaa zaidi, fidia yangu, msamaha wangu, maumivu yangu au fidia, msamaha na maumivu ya kwako?

Hata hivyo, Mimi sikubali nishindwe katika upendo!! Pale ninapooni roho, kwa kunipenda Mimi, amekazana kunilipa fidia, kunipenda, kunitaka radhi, kuniomba msamaha kwa niaba ya wadhambi wengine, Mimi, kwa ajili ya kumlipa, nitamwomba msamaha yeye kwa namna ya pekee, nitalipa fidia na nitapenda kwa niaba yake, na nitakuwa nampamba na kumremba huyo roho kwa Pendo Langu, kwa fidia zangu na kwa msamaha wangu. Kwa hiyo basi wewe endelea kulipa fidia na usizue mgongano au mabishano kati yangu Mimi na wewe.

14. Wadhalimu Wangu Waliweza Kuujeruhi Mwili Wangu, Lakini Hawakuweza Kuugusa Utashi Wangu Wala Pendo Langu. Nimemjalia Kila Binadamu Awe Huru Katika Utashi Wake Na Katika Upendo Wake Kwa Kufanana Nami Ili Aweze Kunikimbilia Kwa Uhuru Wake....Na Aweze Kumsifu Baba...Aweze Kukimbilia Ndani Ya Mioyo Ya Watu Wote Ili Awaguse Kwa Upendo”

Tarehe 30 Desemba 1916, katika Kijitabu Na. 11, Luisa aliandika:

Huku nikiendelea katika hali yangu, nilikuwa nawaza juu ya maumivu ya Yesu Wangu Mpendevu na pia nilikuwa nikitolea kifodini changu cha ndani kilichokuwa kimeunganika na maumivu ya Yesu. Ndipo Yesu ameniambia: “Binti yangu, wadhalimu waliokuwa wanautesa mwili wangu walifaulu kuujeruhi mwili wangu, waliweza kunidharau, kunikanyaga, nk..... lakini hawakuweza kufanikiwa kuugusa Utashi Wangu wala Pendo Langu. Hivyo viwili nilitaka vibaki huru kabisa kusudi viwe kama mikondo miwili inayoweza kuendelea kutiririka kwa nguvu.

Nilitaka pasiwepo na mtu anayeweza kuizuia mikondo hiyo, ili Mimi nijimwage kwa ajili ya manufaa ya watu wote, na hata kwa manufaa ya wenyewe maadui zangu. Wao walikuwa wananichapa mijaledi, na Mimi nilikuwa nalenga na kupiga mioyo yao kwa Pendo langu, na kwa nguvu ya Utashi Wangu nilikuwa nawafunga pingu. Wao walikuwa wanatoboa Kichwa Changu kwa miiba, lakini Pendo langu lilikuwa likimulika kwa nuru yake ndani ya akili zao ili waweze kunijua Mimi. Wao walikuwa wananijeruhi kwa kunisababishia madonda, kumbe Pendo Langu likawa likiponya majeraha ya roho zao. Wao walinisababishia kifo cha mwili, wakati Pendo Langu lilikuwa linawarejeshea Uhai, kiasi kwamba wakati nilipokata roho pale Msalabani, pigo la radi ya Pendo langu lilipogusa moyo wao tu, liliwasukuma waanguke kifudifudi mbele yangu na kunikiri kuwa Mimi ni Mungu kweli.

Sijawahi kumaliza kazi yangu katika utukufu na ushindi namna hii, kama pale nilipokuwa katika maumivu wakati wa Maisha Yangu ya kibinadamu hapa duniani. Kwa kweli, Binti yangu, nimemfanya binadamu afanane na Mimi kwa kumjalia roho iliyo huru katika

utashi na katika pendo, kusudi watu wengine waweze kuathiri matendo ya viumbe kwa nje tu, na pasiwepo na yeyote hata mmoja anayeweza kuathiri matendo ya ndani ya utashi na matendo ya ndani ya pendo. Na Mimi Mwenyewe nimetaka binadamu awe hivyo huru katika utashi na upendo, ili kwa uhuru kabisa na bila shuruti yeyote, aweze kumwaga huo utashi wake na upendo wake juu ya Mimi. Na atakapojizamisha ndani yangu, ataweza sasa kunitolea Mimi matendo matukufu zaidi na safi zaidi, ambayo kiumbe wangu aweza kunipatia. Zaidi ya hilo, kwa vile Mimi ninakuwa ni huru kabisa, na yeye anakuwa huru pia, basi tutageukiana na kutazamana, na kwa pamoja tutakimbilia juu mbinguni, kwenda kumpenda na kumtukiza Baba, na kwenda kuishi pamoja na Utatu Mtakatifu. Na kutoka huko mbinguni, tutakimbia sote kuelekea duniani kuwatendea mema watu wote. Tutakimbia na kuingia ndani ya mioyo ya wote, ili tuwaguse kwa Pendo, na ili kuwafunga kwa mnyororo wa Utashi na kuwafanya wote kuwa mateka wetu. Zawadi ya posa kubwa zaidi ya hiyo sijawai kuweza kuitoa kwa kiumbe.

Lakini je ni wapi ambapo kiumbe ataweza kuringa na huo utashi wake huru na huo upendo wake? Ni katika kuteswa, kwani hapo pendo linaongezeka, utashi unaimarika zaidi na kupata nguvu ya kujitawala. Pia Utashi Wangu huufunga Moyo Wangu na maumivu yake huyo kiumbe na kunivisha kichwani kama taji. Hayo hunifanya nionje huruma na nijitwalie madaraka. Kwa vile nafikia dakika ambapo siwezi kuvumilia kuona maumivu ya huyo roho anayenipenda, Mimi namshika ubavuni pangu kama Malkia na hivyo kiumbe huyo anapata nguvu ya kuvumilia maumivu. Matokeo ni kwamba maumivu hayo humfanya ajipatie nguvu na uwezo zaidi wa kutenda kwa mtindo wa heshima, hadhi, kuvutia, ushujaa, bila ubinafsi wowote, na kwa mtindo unaolingana na mtindo wa kwangu. Yaani, kutokana na hali yake hiyo, viumbe wengine wanavutwa kushindana naye katika fadhila, na hutamani waongozwe na kutawaliwa na mtu wa aina hiyo.

Na jinsi roho huyo anavyozidi kutenda mambo pamoja nami, na jinsi anavyozidi kujifananisha na kujiainisha na Mimi, ni ndivyo na Mimi najiona nachukuliwa na kuingia ndani yake. Hivyo anapofikiri yeye, Mimi naonja mawazo yangu yanachukuliwa na akili yake. Anapotazama yeye, anapozungumza, anapopumua, ndivyo najisikia nimechukuliwa macho yangu, sauti yangu, pumzi yangu, matendo yangu, hatua zangu, mapigo yangu ya moyo na nafsi yangu yote. Na anavyozidi kunichukua ndani yake na yeye ndivyo anazidi kujipatia mitindo yangu ya matendo na ufanano nami. Halafu Mimi huendelea kujiangalia Mimi Mwenyewe ndani ya mtu huyo kama vile ndani ya kioo na hapo ndani yake najiona na kujitambua kama vile nilivyo.

15. Dunia Imeyumba na Kuharibika kwa Vile Imepoteza na Kusahau Dhana ya Mateso Yangu

Tarehe 2 Februari 1917, katika Kijitabu Na. 11, Luisa aliandika:

Pindi nikiwa katika hali yangu ya siku zote, mara nikajisikia kuwa nje ya nafsi yangu na kutojitambua. Ndipo nilimwona Yesu Mpendwa Wangu wa daima akiwa anatokwa Damu mwili mzima na akiwa amevaa taji la miiba la kutisha. Kwa taabu sana aliweza kuniangalia kupitia ile miiba na akaniambia: “Binti yangu, **dunia imeyumba kwa sababu imepoteza wazo la Mateso Yangu. Katika giza dunia haijaweza kuiona ile nuru ya Mateso Yangu ambayo ilikuwa ikiangazia, iliyokuwa inaiwezesha kulijua Pendo Langu. Ni maumivu makali mangapi ninayopata toka kwa roho!!!**

Hapo kabla dunia ilikuwa inaweza kumwelekea na kumpenda Yule aliyekuwa ameipenda kweli kweli. Na nuru ya Mateso Yangu ilikuwa ikiiongoza na kuiwezesha dunia ijiangalie na ijilinde na hatari zote. Katika udhaifu, binadamu hapati tena ile nguvu ya Mateso Yangu, ambayo ilikuwa inamshikilia. Katika kukosa utulivu na subira, hakuweza kuona tena kile kioo cha uvumilivu wangu, uliokuwa unamletea moyoni mwake hali ya utulivu, na nguvu ya kujipokea, kiasi kwamba pale alipoona aibu mbele ya uvumilivu wangu, alijisukuma na yeye mwenyewe kuchukua jukumu la kujitawala katika nafsi yake mwenyewe.

Katika maumivu yake, hakuweza kupata kile kitulizo cha maumivu ya Mungu ambaye wakati alipokuwa anayavumilia maumivu yake, papo hapo alikuwa anatia pendo na hamu ya kukubali kuteseka. Katika dhambi yake, hakuweza tena kupata utakatifu wangu, ambao ulipokuwa unamzunguka ulikuwa unamjalia na kumwingizia ndani yake ile chuki dhidi ya dhambi. Ah! Binadamu amevuruga na amechafua kila kitu, kwani amemtoroka Yule ambaye angeweza kumsaidia. Kwa hiyo basi, dunia imepoteza mhimili wake na hivyo imeyumba.

Binadamu ametenda kama mtoto mdogo, ambaye amegoma kuendelea kumtambua mama yake au kama mfuasi au mwanafunzi, ambaye ingawa anamjua mwalimu wake, lakini hataki kabisa kusikia na kusikiliza vipindi vyake, na hataki kujifunza wala kuzingatia kile alichofundishwa. Je hatimaye kutatokea nini kwa mtoto kama huyo na kwa mwanafunzi wa aina hiyo? Wao wenyewe watakata mateso na watakuwa ni teso na tishio kwa jamii yote. **Na hivyo ndivyo alivyo binadamu: amekuwa ni tishio na ni teso kwa jamii, lakini ni mateso yasiyo na huruma yeyote! Ah! Binadamu anazidi kuharibika na Mimi namlilia kwa machozi ya Damu!”.**

16. Matunda ya Saa Za Mateso: Kila Mara Kiumbe anapojiyeyusha Ndani Yangu, Atatoa Mkondo Unaotiririsha Uhai wa Mungu Kwa Viumbe Wote. Hakuna roho anayeingia tohorani Au Paradisini Ambaye Hana Mhuri wa Hizi Saa Za Mateso.

Hizi Saa ni Ratiba ya Ulimwengu

Tarehe 16 Mei 1917, katika Kijitabu Na. 12, Luisa aliandika

Nikiwa katika hali yangu ya kawaida, **nikawa ninajiyeyusha mimi mwenyewe ndani ya Yesu Wangu Mtamu, na halafu nikawa ninamwaga nafsi yangu yote ndani ya viumbe ili niwapatie Yesu mzima.** Na yeye aliniambia:

“Binti yangu, **mara zote ambapo kiumbe anajiyeyusha ndani yangu huwa anatiririsha uhai wa Mungu ndani ya viumbe wote. Na viumbe hao hujipatia mara matokeo yake kutegemea na mahitaji waliyo nayo. Yule aliye mdhaifu anaonja kupata nguvu, aliye sugu katika dhambi anaanza kupata nuru, anayeteseka anapata kitulizo, na hivyo huwa kwa wengine wote waliobaki”.**

Halafu nikajikuta nipo nje ya nafsi yangu na sijitambui. Nilijikuta nikiwa kati ya roho wengi sana. Walikuwepo roho wanaotakaswa tohorani na walikuwepo roho watakatifu. Roho hawa walikuwa wanamtaja mtu mmoja niliyemfahamu ambaye alikuwa amekufa si muda mrefu uliopita. Walinielea kuwa mtu huyo anafurahi sana kuona kuwa **hapakuwa na roho hata mmoja aliyekwenda tohorani ambaye hakuwa na mhuri wa Saa za Mateso. Roho huyo anasaidiwa na kusindikizwa na hizi Saa za Mateso hadi anapochukua nafasi yake mahali pale palipo salama. Halafu hakuna roho anayerukia paradisini na akawa hajasindikizwa na hizi Saa za Mateso. Saa hizi za Mateso hunyeshea daima umande endelevu iwe juu ya dunia, iwe ndani ya toharani na hata kufika kule mbinguni.**

Niliposikia maneno hayo, nilijiambia moyoni mwangu: “Inaonekana kwamba Mpendwa Wangu Yesu, hamwokoi roho isipokuwa kwa kutumia hizi Saa za Mateso. Hii ni kwa ajili ya kuzingatia kauli yake aliyokwisha kutoa kwamba, kwa kila neno la Saa za Mateso, atakuwa anatoa zawadi ya roho mmoja. Kishapo nilirudi katika hali ya kawaida na kujitambua na ndipo nikamwona Yesu Wangu Mtamu. Nilimwuliza iwapo jambo hilo ni la kweli. Naye alinijibu:

“**Hizi saa za Mateso ni ratiba ya ulimwengu. Zinapatanisha mbingu na dunia. Zinanishika na kunizuia Mimi nisiipeleke dunia kwenye uharibifu na maangamizi. Zinanifanya nisukumwe kutumia Damu yangu, majeraha yangu, Pendo Langu na chochote kile nilichokuwa natenda. Hivyo vyote huanza kutiririka juu ya watu wote, ili kuweza kuwaokoa wote. Na jinsi roho wanavyozidi kutekeleza hizi Saa za Mateso, Mimi hapo najisikia kuanza kuhuisha Damu yangu, Majeraha Yangu, dukuduku zangu za kuokoa roho. Ninajionja kurejea katika Uhai Wangu. Je hapo viumbe watawezaje kujipatia manufaa yoyote kama siyo kwa njia ya hizi Saa za Mateso? Kwa nini wewe unatia mashaka? Jambo hili siyo la kwako bali ni la kwangu. Wewe umekuwa chombo tu kilicholazimishwa na kilicho dhaifu”.**

17. Neno Lolote Kuhusu Mateso Yangu Juu ya Wazo Langu, Taabu Zangu, Fidia Zangu, Huwasha Umeme Mwingi wa Mawasiliano Kati Yangu na Roho

Tarehe 12 Julai 1918, katika Kijitabu Na. 12, Luisa aliandika

Nilikuwa katika kusali kwa ajili ya roho mmoja aliyekuwa mahututi na akiwa na hofu fulani na katika mahangaiko. Ndipo Mpendwa Wangu Yesu alikuja na kuniambia:

“Binti yangu, kwa nini unaogopa? Je hufahamu ya kuwa kila kauli juu ya Mateso Yangu, mawazo yangu, taabu zangu, fidia, kumbukumbu za maumivu yangu, huwasha umeme mwingi kabisa wa mawasiliano kati yangu Mimi na roho anayetekeleza tafakari? Na kutokana na hilo roho huwa anapambika na uzuri wa aina mbalimbali. Yeye ametekeleza Saa za Mateso, amejivika Damu Yangu, amepambika kwa majeraha yangu. Mimi nitampokea huyo roho kama binti wa Mateso Yangu. Huyo roho ni ua lililokua katika moyo wako na Mimi nalibariki ua hilo na ninalipokea ndani ya Moyo Wangu kama ua teule na la kupendelewa”. Na alipokuwa akisema hayo, ua moja lilitoka moyoni mwangu na likarukia kwa Yesu.

18. Ni Mema Mangapi Yapatikana Kutokana Na Fikara Juu ya Mateso Ya Yesu Ambamo Kuna Tiba ya Mabaya Yote Ya Binadamu

Tarehe 21 Oktoba 1921, katika Kijitabu Na.13, Luisa aliandika:

Nilikuwa nikiwaza juu ya Mateso ya Yesu Wangu Mtamu. Yeye aliponijia aliniambia:

“Binti yangu, mara zote roho anapotafakari juu ya Mateso Yangu, anapojikumbusha juu ya kile nilichoteseka Mimi, anaponihurumia, hapo anajikumbusha ndani yake uchungu wa maumivu yangu. Hapo Damu Yangu hupanda ili kumwosha. Majeraha Yangu huanza kumponya kama amepondeka na pia huanza kumremba na kumpamba kama yu safi. Na mastahili yangu yote huanza kumwongezea utajiri. Panaanza utitiri wa ajabu wa mabadilishano: Ni sawa kama angemwaga juu ya benchi mambo yote yote niliyokuwa nimetenda na kuteswa, naam hata mara dufu yake. Kwa sababu hiyo, kila kitu nilichokuwa nimetenda na kila teso nililopata, ni daima tendo endelevu la kujitoa Mimi Mwenyewe kwa binadamu, kama vile jua huwa daima katika tendo endelevu la kutoa mwanga na joto kwa dunia.

Tendo lolote lile la kwangu kamwe haliwezi kuchoka, kuchakaa wala kudhoofu wala kufifia. Inatosha tu kwa roho yeyote kulitaka na mara zote anapolitaka atalipata lile tunda la Uhai Wangu. Kwa sababu hiyo, iwapo mtu atakumbuka Mateso Yangu mara ishirini, au mara mia au mara elfu, ndivyo mara hizo zote, na hata zaidi kabisa ya hapo, mtu huyo atafaidi matunda yake. Lakini fikiria ni wachache jinsi gani watu waliopo wanaotekeleza na kufaidika na hazina hii ya Mateso! Licha ya faida yote hiyo ya Mateso Yangu, unaweza

kuwaona bado roho wale walio dhaifu, vipofu, viziwi, bubu, viwete, na hata walio ni maiti zinazotembea ambao wanachukia na kudharau Mateso Yangu. Kwa nini hivyo? Ni kwa vile Mateso Yangu yameachwa pembeni na kusahaulika.

Maumivu yangu, majeraha yangu, Damu Yangu ndizo nguvu zinazoondoa madhaifu, ndizo ni nuru inayowawezesha vipofu kuona, ndizo ni ulimi unaolegeza na kufungua masikio yaweze kusikia. Hizo ndizo njia inayowaongoza viwete na viguru. Na hizo ni Uhai ule unaowafanya wafu wafufuke. Katika Uhai Wangu na katika Mateso Yangu zipo tiba zote zitakiwazo kwa ajili ya binadamu wote.

Lakini kwa bahati mbaya viumbe wanadharau dawa, na wala hawazijali tiba zipatikanazo. Na kwa hali hiyo unaona kwamba licha ya kazi yangu yote ya ukombozi, hali ya binadamu inazidi kuangamia, kana kwamba kaingiwa na ugonjwa wa kifua kikuu. Na kitu kinachoniumiza zaidi ni kuwaona watu wa wakfu wanaojihangaisha kutafuta maarifa ya imani, tafiti za imani na hadithi za imani wakati hawatekelezi lolote linalohusu Mateso Yangu. Na kwa vile mara nyingi Mateso Yangu yameachwa na kusahaulika makanisani na kutoka midomo ya mapadre, zungumza y ao na mahubiri yao hukosa ile nuru na watu hubaki na njaa zaidi na kukosa lishe zaidi kuliko hapo kabla”.



Yesu Msulibiwa - Msalaba wa Kanisa Kuu la Cividale, Udine, Italia

Yesu Msulibiwa - Msalaba wa Kanisa la Abasia Peramiho, Songea, Tanzania



Yesu Msulibiwa - Msalaba wa Kanisa la Ruhuwiko, Songea, Tanzania

